



Aqqalu C. Jerimiassen  
Atassut

UKA 2022/77  
09. november 2022

**Namminersorlutik suliffeqarfutillit immiaaqqanik, viinninik imigassallu kimittuunik eqqussisinnaangornissaat anguniarlugu Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaanik peqquneqassasut Inatsisartut aalajangiiffigisassaattut siunnersuut.**

(Inatsisartunut Ilaasortaq Jens-Frederik Nielsen, Demokraatit)

Nioqqutissanik avataaniit annertunerusumik pissarsisarsinnaanissarput suli inerisarneroqqissallugu oqilisaavigeqqissallugulu soqutiginaateqartuuvoq. Killissaattumilli avataaniit eqqussuisinnaanerup sapinngisamik atuutilinnginnissaattaq eqqumaffigisariaqarluni.

Atassummiit oqartuaannarpugut, unammillerneq atuisunut peqqinnartuuvoq. Suliffeqarfinnulli namminersortunut tamatigoqqinnaajusariaqanngilaq peqqinnartuunissaa, inuit ataasiakkaat suliffeqarfuteqanngitsut naaffeqanngitsumik avataaniit namminneerlutik tikeraatiteriliinnalissappata nunatsinni niuertarfiit atorunnaarlugit, aningaasaq nunatsinniit annissorneqartoq, niuertarfiillu ingerlanerannut innarleeriataarsinnaanera tamaat qulaaqqaarneqartariaqarnera Atassummiit paaseqqaassallugu pingaartuutissinnaavarput.

Siunnersuulli toqqammaviatigut paasisinnaalluaqaarput, nunatsinnimi puiaasat aaliangersimaqqinnaartut atorgit inatsiseqarneq ilanngulluni nutaanerulaamik ingerlariaqqissinnaangaluarnermuttaq killiliilluinnaqqammat.

Viinnit aaliangersimasut ilai imaaliinnarluni nunatsinni pissarsiassaaneq ajorput, avataaniillu pissarsiariniarnissai pilerinartaraluaqigut inatsisitta tamanna ajoraluartumik ajornakusoortittaqaat.

Erseqqissaatigilaarusupparali, uani inuit imingassamik atuinerulernissaat soorunami Atassummiit orniginartinngilarput, taamaattorli illuanittaaq taarusullugu, imigassaq tassaaqqinnaartariaqanngimmat taamaallaat aanngajaarniutitut atungassiaq. Nunarsuarmioqatitta imingassaq ila sorpassuarnut atortaqaat, soorlu iganerminni viinnit aaliangersimasut ilaanni atorneqartarnerat takusassiarilluartarlugu, taannalu maani nunatsinni pigineqanngippat igaat imaaliinnarlugit assiginik assersuutingalugit sanasinnaangilagut.

Ajornaqaarmi imigassaq eqqartorneqalersillugu ajortuinnaanera kisimi ukkanniartariaqanngilaq, allanut qanoq atorsinnaassutaata aanngajaarniutaannaanginneratalu toqqortinngikkaluarlugu paasisitsiniutigineqarsinnaanera isumaasinnaalluarmat. Akisunerujussuatalumittaaq tamanna killilersorluartaqaa, igaat nerisassialluunniit imikkuullarissuusinnaangaluit imigassamik ingasattajaaluatsiartumik paquminarsaaniartarnitta akisutitsinerujussuattalu soqutiginarunnaarsissinnaasarpaa. Periarfissanik nutaanerusunik qinerleqatigiinniarta.

Taamaattumik siunnersuut Atassummiit soqutiginaateqarluartillugu  
Inuussutissarsiornermut aatsitassanullu ataatsimiitsitaliamut innersuupparput.

